

Ս. Հ. ՀՈՎՀԱՆՆԻՍՅԱՆ, Ամուսնա-ընտանեկան իրավունքը վաղ ավատական Հայաստանում (4—9-րդ դդ.), ՀՍՍՀ ԳԱ հրատարակություն, Երևան, 1976, 406 էջ:

Գրախոսվող մենագրության մեջ լրիվ և ամբողջական գծերով բացահայտվում են հայ ամուսնա-ընտանեկան իրավունքի էությունն ու պատմական կոչումը, նրա ինստիտուտների բովանդակությունն ու ներքին բնույթը պատմական այն ժամանակներում, երբ նոր էին կազմավորվում ու զարգանում հայ կանոնական ու աշխարհիկ օրենսդրությունները: Հիմք ու ելակետ ընդունելով մատերիալիստական դիալեկտիկական մեթոդը, Ս. Հովհաննիսյանը ցույց է տվել, որ հայ հողի վրա էլ ընտանիքն ու նրա ձևերը, ընտանեկան իրավունքն ու նրա ինստիտուտներն իրենց գոյությունը միշտ էլ պայմանավորված են եղել այն տնտեսական, հասարակական-քաղաքական ու դասակարգային գործոններով, որոնց հիմքի վրա դրանք առաջացել ու որոնց ուժով պայմանավորել են իրենց սեփական գոյությունը: Այս դիրքերից էլ Ս. Հովհաննիսյանը համակողմանի կերպով և խորությամբ ուսումնասիրել է վաղ ֆեոդալական Հայաստանի ամուսնա-ընտանեկան իրավունքն իր ամբողջության մեջ, հետազոտել աշխարհիկ-կանոնական օրենսդրության հիմքի վրա ստեղծված այդ իրավունքը և հետամուտ եղել դրա զարգացմանն ուսումնասիրվող տեական պատմաշրջանի՝ IV—IX դդ. ընթացքում:

Մենագրության արժեքը նաև նրանում է, որ այն շարադրելիս հեղինակը կիրառել է պատմահամեմատական մեթոդը: Նա հայ իրավունքի այդ ճյուղի ինստիտուտներն ու հասկացությունները քննում է ոչ թե ազգայնորեն կղզիացված վիճակում, այլ դրանք համեմատելով պատմական այդ ժամանակաշրջանում Հայաստանի հարևան երկրների՝ Պարսկաստանի, Հռոմի, Ասորիքի, Բյուզանդիայի, Վրաստանի և մովսիսական ու թալմուդական ամուսնա-ընտանեկան իրավունքի համապատասխան ինստիտուտների ու հասկացությունների հետ: Մենագրության մեջ քննադատվում են օտարազգի և հայ այն գիտնականները, ովքեր իրենց աշխատություններում տասնամյակների ընթացքում հակագիտական դատողություններ են արել հայ իրավունքի, այդ թվում՝ հայ ամուսնա-ընտանեկան իրավունքի մասին, փորձելով ժխտել դրանց ինքնուրույնությունն ու հայկական լինելը և անգամ պնդել, որ հայերը, իբր թե սեփական օրենսդրություն և իրավունք չեն ունեցել ու նրանց մոտ միշտ էլ գործել են օտար օրենքներ:

Գրախոսվող մենագրությունը բաղկացած է առաջաբանից և 9 ընդարձակ գլուխներից: Առաջաբանի մեջ հեղինակը գիտականորեն հիմնավորում է թեմայի արդիականությունը և գնահատում խնդրո առարկա պրոբլեմի հետազոտության ուղղությամբ այնպիսի երևելի գիտնականների վաստակը, ինչպիսիք են Վ. Բաստամյանցը, Խ. Սամվելյանը, Հ. Մեղավորյանը, Ն. Մելիք-Թանգյանը, Ա. Ղլճյանը և ուրիշներ: Այդտեղ մատնանշվում են նաև հիմնական իրավական աղբյուրները, որոնց վրա կառուցված է մենագրությունը՝ «Հայոց կանոնագիրք»-ը, «Ասորա-հռոմեական դատաստանագիրք»-ը և այլն:

Մենագրության առաջին գլխում հեղինակը քննում է հայ ամուսնա-ընտանեկան իրավունքի նյութական և իրավական, այդ թվում՝ իրավահայտ աղբյուրները, տալով դրանց բնութագիրն ու գիտական նշանակությունը: Իրավացիորեն ընդգծելով, որ այդ իրավունքի հիմնական ու ելակետային աղբյուրը դասակարգային հասարակության, տվյալ դեպքում՝ հայ վաղ ֆեոդալական հասարակության նյութական պայմաններն են, հեղինակն այնուհետև անցնում է իրավական ու իրավահայտ աղբյուրների բնութագրմանն ու արժեքավորմանը:

Երկրորդ գլուխը նվիրված է վաղ ֆեոդալական Հայաստանում աշխարհիկ-կանոնական ընտանեկան իրավունքի ծագման ու ձևավորման պրոբլեմին: Հեղինակը հետազոտում է ոչ միայն իրավական այդ նոր վերնաշենքի՝ ընտանեկան իրավունքի, ձևավորման պրոցեսը, դրա զարգացման պատմական պայմանները, կազմավորումը, այլև ուսումնասիրվող դարաշրջանի իրա-

վումների, հատկապես բնտանեկան իրավունքի, հիմնական սկզբունքները, Հեղինակը կոնկրետ փաստերով ապացուցում է, որ սկսած IV դ. հայ հոգի վրա ընտանեկան հարաբերությունները նորմավորվում են կարգավորվում են աշխարհիկ և կանոնական իրավունքով:

Աղյախոսության հաջորդ գլուխը նվիրված է հայ ընտանիքի ձևերին, կազմին ու ֆունկցիաներին: Ղեկավարվելով մարքս-լենինյան տեսությամբ և ելակետ ընդունելով Ֆ. էնգելսի «Ընտանիքի, մասնավոր սեփականության և պետության ծագումը» հանճարեղ աշխատության գիտական սկզբունքները, հեղինակը բացահայտում է ընտանիքի ու Հայաստանում դրա հոմանիշ «երգ», «տուն», «ծուխ» ըմբռնումների էությունը: Վերլուծելով իր հավաքած փաստական և իրավական հսկայական նյութը, հայ և օտար պատմիչների՝ Մովսես Խորենացու, Փավստոս Բուզանդի, Աղաթանգեղոսի, Հովհան Մամիկոնյանի, Ստեփանոս Օրբելյանի, Զենոբ Գլադի և ուրիշների ուղղակի և անուղղակի հաղորդումները, նա համոզիչ կերպով ցույց է տալիս, որ վաղ ֆեոդալական Հայաստանում ընտանիքի տիրապետող ձևը հանդիսացել է մենամուսնության վրա հիմնված այսպես կոչված փոքր անհատական ընտանիքը, որի կազմի մեջ մտել են հիմնականում ծնողներն ու զավակները, և որ այդ ընտանիքը եղել է հասարակության յուրատեսակ լիցի՝ հիմնված հասարակական-տնտեսական գործոնի վրա:

Մենագրության յոթերորդ գլխում հեղինակը հետազոտում է նշանադրության ինստիտուտն իր պատմական դարգացման մեջ: Մատնանշելով նշանադրության անմիջական նպատակները, նա ցույց է տալիս, որ պատմական Հայաստանում դա տարածված, և որ կարևորն է, օրինականացված յուրօրինակ սոցիալական երևույթ էր: Այն կողմերի միջև որոշակի իրավունքներ ու պարտականություններ էր առաջացնում և այդ պատճառով էլ հանգամանորեն կարգավորվում էր ինչպես աշխարհիկ, այնպես էլ, մասնավոր, կանոնական օրենքներով:

Առանձնապես բովանդակալից և ծավալուն է աղյախոսության հինգերորդ գլուխը, որը նվիրված է ամուսնության, այսինքն պսակի կամ պսակադրության ինստիտուտին վաղ ֆեոդալական Հայաստանում: Այստեղ ամենից առաջ լուսարանվում է այն հարցը, թե քրիստոնեության հաղթանակով ինչ փոփոխություններ կատարվեցին ամուսնա-ընտանեկան իրավունքի ու հարաբերությունների բնադավառում: Հեղինակը հետևողականորեն հետազոտում է ամուսնության հասկացությունը և դրա դարգացումը, պսակադրության ծագումը, դարգացումը և իրավական կարգավորումը, պսակի և կեղեցական կարգը, այդ կարգը խախտողների նկատմամբ ձեռնարկված իրավական, ույզ թվում քրեական-իրավական միջոցները, բնութագրում է հոգեոր պաշտոնատար անձանց իրավունքներն ու պարտականությունները՝ պսակադրությունն իրականացնելիս: Այն, Հովհաննիսյանը, իրեն դիտական ընդհանրացում, մատնանշում է, որ վաղ ֆեոդալական Հայաստանում ամուսնության իրավական հիմքը եկեղեցական համապատասխան ամուսնական ձևականաբարումն է Աստվածաշնչի և հայոց ծիսարան «Մաշտոց»-ի պահանջների պարտադիր պահպանմամբ:

Մենագրության վեցերորդ գլուխը վերաբերում է ամուսնության դադարման ինստիտուտին: Այդ գլխում լուսարանվում են այնպիսի կարևոր հարցեր, ինչպիսիք են ամուսնության դադարումը և դրա դրոժնական ու իրավաբանական նախադրյալները:

Ընտանիքի կազմավորմամբ չափազանց կարևոր նշանակություն են ստանում ամուսինների անձնական և գույքային (ինչքային) հարաբերությունները, ամուսինների՝ միմյանց նկատմամբ ունեցած իրավունքներն ու փոխադարձ պարտականությունները: Մենագրության մեջ այդ հարցերին առանձին բաժին է նվիրված՝ 7-րդ գլուխը, իսկ աղյախոսության հաջորդ՝ ութերորդ, գլուխը նվիրված է ծնողների և զավակների անձնական ու գույքային (ինչքային) իրավահարաբերությունների լուսարանմանը:

Մենագրության վերջին գլխում քննվում են ամուսինների մերձավոր, արյունակից ազգականների միջև առաջացող իրավահարաբերությունները: Այստեղ լուսարանվում են նաև խնամակալության ու հոգաբարձության ինստիտուտները, որոնց մասին բովանդակալից առանձին իրավաբանական կան հայ աշխարհիկ ու կանոնական օրենքներում և բազում հաղորդումներ՝ հայ պատմիչների մոտ:

Այսպիսով, ամբողջությամբ առած Ս. Հովհաննիսյանի մենագրությունը հայ իրավունքի պատմությանն ու տեսությանը նվիրված մնայուն գործ է, գիտական կարևոր ներդրում հայ իրավունքի պատմության ուսումնասիրման բնագավառում:

Աղյախոսության մեջ տեղ են գտել առանձին թերություններ ու անճշտություններ: Հեղինակի պատկերացումներում որոշ շփոթ կա իրավունքի «իրավական» և «իրավահայտ» աղբյուրների էության մասին: Իրավական են կոչվում այն աղբյուրները, որոնք պատմականորեն զործող օրենքներ են և կել, օրինակ, մեր «Կանոնագիրք»-ը, Մխիթար Գոշի և Սմբատ Սպարապետի

դատաստանագրքերը. «Ասորա-հռոմեական դատաստանագրք»-ը և այլն: Իրավահայտ աղբյուրներն այն նյութերն են, որոնք օրենքներ չեն. բայց որոնցով այս կամ այն շափով ճանաչվում ու ընկալվում է երբևէ գործող օրենքների ու իրավունքի էությունը: Իրավահայտ աղբյուրներն են, օրինակ, հայ պատմիչների գործերը, ազգագրական նյութերը, վիճադիր արձանագրությունները, հայրենները, մեր ազգային էպոսը. առանձին դեպքերում՝ ժողովրդական հնգիաթները և այլն: Մինչդեռ հեղինակը իրավահայտ աղբյուր է համարում «Հայոց կանոնագիրք»-ն ու նույնիսկ Մխիթար Գոշի «Դատաստանագիրք»-ը (էջ 342):

Քննադատելի է այն, որ աշխատության առաջին գլխում քննության են առնվում իրար հետ առանձին առնչություն չունեցող երկու տարբեր հարցեր. ա) աղբյուրների և ընդհանուր գրականության տեսություն, և բ) ընտանեկան իրավունքը ստրկատիրական Հայաստանում, հարցերը: Դրանք հարցեր են, որ պետք է քննվեին ու ավելի մանրամասն լուսաբանվեին առանձին, ավելի ճիշտ՝ տարբեր գլուխներում, քանի որ դրանց ուշումնասիրության առարկաներն ու բնագավառները միանգամայն տարբեր են:

Անընդունելի է հեղինակի այն պնդումը. թե իբր մայրենիքը սեփականության ինքնուրույն ձև է. Հայկական տնտեսական կատեգորիաների և իրավունքի ուսումնասիրությամբ զբաղված այնպիսի ճանաչված հեղինակություններ, ինչպիսիք են Ն. Ադոնցը, Լ. Մելիքսեթ-Քեկը, Խ. Սամվելյանը, Ա. Սուքիասյանը, Թ. Ավդալբեգյանը, Վ. Ռշտունին, Ն. Թովմասյանը և որիչները սեփականության նման ձև չեն ընդունում. դա ոչ այլ ինչ է, եթե ոչ սեփականություն ձևող բերելու եղանակներից մեկը, յուրատեսակ պարզեցական, ինչպես այդ մասին հիշատակում են հայ պատմիչները և հայկական օրենսդրական-իրավաբանական հուշարձանները:

Մենագրության մեջ հաճախ է խոսվում «օրենսդրի» մասին, որի ջանքերով ժամանակի ընթացքում իբր ընդունվել են համապարփակ օրենսդրական ակտերը, օրինակ. «Կանոնագիրք»-ը, դատաստանագրքերը և այլն: Գործի համար խիստ շահեկան կլինեին, եթե հեղինակն իր խոսքն ասեր այն մասին, թե հայոց պատմության մեջ, առանձնապես կենտրոնական պետականության կորստի ժամանակաշրջանում, եղել են արդյոք օրենսդիր օրգաններ և եթե այո, կոնկրետ ինչում է արտահայտվել նրանց պրակտիկ գործունեությունը: Պետք է պատասխան տրվեր նաև այն հարցին, թե անհատ գործիչները, օրինակ. Օձնեցին, Գոշը, Սմբատ Սպարապետը կամ եկեղեցական-կրոնական կազմակերպությունները պատմության ընթացքում կատարել են արդյոք օրենսդիր օրգանների դեր: Այս կարևոր հարցը, դժբախտաբար, մնացել է անպատասխան:

Գրքում տեղ են դրել նաև երկրորդական կարգի թերություններ ու անճշտություններ. օրինակ, 57-րդ էջում խոսվում է այն մասին, որ իբր Կարսոն ունի «Grundriss der Geschichte des armenischen Rechtss» երկհատոր աշխատություն՝ հրատարակված Շտուտգարդում՝ 1906 և 1907 թթ.: Իրականում նման երկհատորյակ գոյություն չունի: Կարսոնի երկհատոր մենագրությունը կոչվում է «Sempatscher kodex aus dem XIII Jahrhundert», և հրատարակվել է Ստրասբուրգում՝ 1905 թ.: Ինչ վերաբերում է «Grundriss»-ին, ապա դա նույն Կարսոնի գրչին պատկանող ըստ էության ժուռնալային ընդարձակ հոդված է, որը թարգմանված է հայերեն և մասամբ տպագրված է «Բազմավես»-ի 1907 և 1908 թթ. համարներում: Աշխատության 234 էջում հեղինակը գործածում է «...դատաստանագրքի... հոդվածները ոտնահարողները ենթարկվում էին... պատասխանատվության» անհաջող արտահայտությունը: 384-րդ էջում «Բուլանխ» բառի փոխարեն պետք է լինի «Բուլանուխ» կամ «Բլանուխ», այսինքն Արևմտյան Հայաստանի գավառներից մեկի ճիշտ անվանումը:

Քննադատելի է այն, որ մենագրությունն անձանությունների և տեղանունների ցանկեր չունի, և չենք խոսում ոռոսերեն և օտար լեզուներով ամփոփումների բացակայության մասին, որոնք կօգնեին ավելի դյուրին յուրացնելու նյութը և բացի այդ ընթերցողների ավելի լայն շրջան կնվաճվեր:

Մատենանշված թերությունները, սակայն, առանձին որակ չեն տալիս և չեն կարող նսեմացնել սեղանի վրա դրված մենագրության բարձր արժանիքները:

ԱՐՇԱԿ ԹՈՎՄԱՆՅԱՆ
Իրավաբանական գիտությունների դոկտոր